

# INUIT ATAQATIGIIT

## INATSISARTUNI



UPA16/46  
4. maj 2016  
Peter Olsen

**Meeqqat atuarfianni atuartut akulliit ilinniarnissamut periarfissat assigiinngitsut qanoq atorneqarnissaannut atuartut ilisimasaasa annertusarnissaat siunertaralugu immikkut ittumik siunnersuinissat aallartinneqarnissaat aallartinniarlugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Suliniutissaq ukioq 2017-imi aallartinneqassaaq, paasisassarsiorlunilu angalanissanut, suliffeqarfinnut alakkarterinissanut suliffeqarfeqarfillu pillugu ilinniartitsinernut immikkut aaqqissukkanut aningaasanik kommuninit qinnuteqarfigineqarsinnaasunik pilersitsinissaq aaqqissorneqassalluni.**  
(Inatsisartunut ilaasortaq Naaja H. Nathanielsen, Attaviitsoq)

Oqaluuserisassamut qulaani pineqartumut matumuuna Inuit Ataqatigiinniit imatut oqaaseqaateqassaavut.

Siullermik siunnersuuteqartumut inatsisartunut ilaasortamut Naaja H. Nathanielsenimut qujanarujussuaq oqaluuserisassamut uunga soqutigineqartumut inuiaqatigiinnullu tamanut pingaaruteqarluinnartumut.

Meeqqatta siunissaa inersimasunngorunilu qanoq inuuneqarumaarnissaa uagut angajoqqaajusugut nammineq akisussaaffigilluinnarparput. Meeqqatta toqqissimasumik angerlarsimaffissaqartinneratigut, isumassorneratigut, maligassiuinitsigut, kissalaamik asanninnermillu tunioraajuarnitsigut, meeqqatta inuunermik nuannarisqaqalernissaa, kajumissuseqalernissaa alapernaassuseqalernissaalu qulakkeersinnaavarput.

Uagut angajoqqaajusugut taassaavugut meeqqatsinnik ilitsersuisussatut aqutissiuussisussatullu pingaarnerpaat. Pisussaaffigaarput aamma akisussaaffigaarput, pisussaaffippullu sumiginnassanngilarput, akisussaaffippullu allamut tunniutinngisaannassavarput.

Eqqissilluta meeqqavut issiaqatigalugit, nerinerulluunniit nalaani siunissaq pillugu, sunngorusussinnaaneralluunniit pillugu oqaloqatigisarnissaat pingaartillugulu pikkoriffiginerusariaqarparput.

Taamaattumik....

Naalakkersuinikkut suliassatta anguniagassattalu pingaarnerpaartaasa ilagisariaqarpaat, angajoqqaat amerlanerpaartaasa peqqissuullutillu, nukissaqarluartuullutillu meeqqaminnik maligassiuisinnaalluartut aqutissiuuisinnaalluartullu pilersissallutigit.

Tassa kisianni ajoraluartumik angajoqqaat pisussaaffimminnik akisussaaffimminnillu ullumikkut sumiginnaasut nunatsinni amerlavallaarujussualersimapput. Tamatumalu takussutissartaraa ajoraluartumik meerartatta amerlavallaat ilinniaqqinnissaminnut ingerlaqqinngitsoortartut amerlavallaalersimanerat.

Angajoqqaat pisussaaffimminnik akisussaaffimminnillu kivitsisinnaanngippata, taava uagut naalakkersuinikkut akisussaaffimmik annerusumik tiguisariaqarpugut, ajornartorsiutaasullu minnerpaaffianiitneqarnissaa anguniarlugu iliuuseqartariaqarluta.

Taamaattumik paasilluarlugulu tupaallaatiginngilarput meeqqat atuarfianni akullerni aqutissiuissarnerup tungaasigut nukittorsaasariaqarnerput pillugu Naaja H. Nathanielsen siunnersuuteqarmat.

Naaja H. Nathanielsenip siunnersuutaa taperserparput, kisianni aamma naalakkersuisut isumaqatigaavut aqutissiuussisarnerup tungaasigut nukittorsaaneq akullerninnaq kisiat pinnagu aammali angajullerni aqutissiuussisarnerup nukittorsarneqarnissaanik aamma ilaqartinneqartariaqarneranik oqariartuuteqarmata siunnersuuteqarmatalu.

Kisianni naalakkersuisut allannguutissatut siunnersuutaat tamakkiisumik tapersinngilarput aamma taamatut isikkoqartillugu akuerinngilarput.

Naaja H. Nathanielsenip siunnersuutaa tunngaviusumik taperserparput. Naaja H. Nathanielsen taperserparput siunnersuutimi imatut oqariartormat: "Suliniutissaq ukioq 2017-imi aallartinneqassaaq, paasisassarsiorlunilu angalanissanut, suliffeqarfinnut alakkarterinissanut suliffeqarfeqarfillu pillugu ilinniartitsinernut immikkut aqqissukkanut aningaasanik kommuninit qinnuteqarfigineqarsinnaasunik pilersitsinissaq aqqissorneqassalluni"

Naatsumik oqaatigalugu Naaja H. Nathanielsenip atuartuni akullerni aqutissiuussisarnerup nukittorsarneqarnissaanik aammalu paasisassarsiorluni angalanissamut aningaasanik atugassanik qinnuteqaatigineqarsinnaasunik 2017-mi aningaasanut inatsimmi immikkoortitsisoqarnissaa Inuit Ataqatigiinnit isumaqatigaarput. Pingaartutut pisariaqarluinnartutullu Inuit Ataqatigiinnit tamanna isigaarput, minnerunngitsumik nunaqarfimmiut, isorliunerusullu eqqarsaatigalutigit.

Naalakkersuisut allannguutissatut siunnersuuteqarnerminni taakkartugaat soorlu sulisitsisut aammalu Air Greenland allallu suleqatiserineqarnissaannut tunngasoq, Naaja H. Nathanielsenip siunnersuutaataa, suliakkiussaatalu iluani suliaasaareersutut isigigatsigit naalakkersuisut siunnersuutaat pisariaqanngitsutut Inuit Ataqatigiinniit isigaarput.

Taamaattoq aappassaaneerneqannginnerani ilinniartitaanermut ilisimatusarnermullu ataatsimiisitaliamut ingerlateqqinnissaa Inuit Ataqatigiinniit kissaatigaarput, tassani akullerni atuartut kisimik pinnatik aammali angajullerni atuartut aqutissiuunneqarlutillu angalanissamut aamma qinnuteqarsinnaanissaata aqutissiuunneqarsinnaanissaat siunertaralugu.

Qujanaq

Peter Olsen